

## Austrália Liberta Bernard Collaery Husi Tribunal, TL Agradese No Planu Fó Kondekorasaun

Business Timor, 11 July 2022



DÍLI----Governu Austrália liberta ona sidadaun Bernad Joseph Edward Collaery husi Tribunal, Governu Timor-Leste husu agradese no ba oin Ministra Negosiu Estranjeiru no Kooperasaun (MNEK) tau iha proposta sei hanoin atu fo mós kondekorasaun.

Tuir Ministra Negosiu Estranjeiru no Kooperasaun (MNEK), Adalzija Albertina dos Reis Magno hatete, Governu husu agradese tebes ba Tribunal nia desizaun ba Bernard Joseph Edward Collaery, tanba ne'e nia parte sei tau ida ne'e iha proposta se Governu Timor Leste fo kondekorasaun ne'e di'ak liu tan.

"Sim...sei Governu hanoin bele fo kondekorasaun ba sidadaun Austrália Bernad Joseph Edward Collaery di'ak liu tan, ne'e ha'u nia proposta nia parte simu telefone husi Ministra Negosiu Estranjeiru Australiano katak Governu Austrália atu anunsia liberta Bernard husi tribunal," Hateten Ministra Negosiu Estranjeiru no Kooperasaun (MNEK), Adalzija Albertina dos Reis Magno ba Jornalista sira hafoin hala'o Konferensia Pers iha Aeroportu Internasional Prezidente Nicolao Lobato, Sabadu (09/07).

Governante Afirma, Governu Timor Leste hakfodak no sente kontente, husu obrigado hato'o agradese ba prokurador jeral Austrália katak Timor Leste kontente ho desizaun. Antes Governu Austrália anunsia, Ministra Negosiu Estranjeiru Austrália, Pheny Wong passa ona informasaun ba MNEK Rasik katak Kazu ba Bernard Collaery Governu Austrália atu anunsia liberta husi tribunal.

"Ministra Negosiu Estranjeiru, Pheny Wong telfone uluk ha'u oras ida nia laran sira atu halo Anunsiu katak sira atu taka ona Kazu ba Bernard Collaery entaun kontente teb-tebes ho hakfodak, ha'u apresia tebes ha'u husu obrigada kedas ba Ministra Pheny Wong hato'o mós ba prokurador jeral katak Timor agradese no kontente lo'os kona-ba desizaun Austrália nian," Nia Salieta.

Entaun ida ne'e ba oin atu hametin liu tan level ida aas entre Timor-Leste ho Governu Australiano bele serbisu hamutuk di'ak liu tan iha area sira hotu-hotu tanba iha loron Sexta 8 fulan Jullu Governu TimorLeste ne'ebé lidera husi Primeiru Ministru Taur Matan Ruak hasai komunikadu imprensa ida, saúda desizaun Governu australia nian ne'ebé liberta ona akuzasaun hasoru Bernard Joseph Edward Collaery ne'ebé pública sai informasaun ligadu ho divulga informasaun konfidensiál sira kona-ba suposta operasaun espionajen Austrália nian iha Timor-Leste.

Portavós Governu nian, Ministru Prezidénsia Konsellu Ministrus, Fidelis Manuel Leite Magalhães, lori Konsellu Ministrus no Governu tomak nia naran, hato'o parabéns ba Governu australianu ba desizaun ida ne'ebé justa no afirma katak korresaun ba erru ne'ebé uluk komete ona sei kontribui atu haklean liután relasaun amizade entre país viziñu rua ne'e.

Governu Konstitusionál VIII, ne'ebé lidera husi Primeiru-Ministru, Taur Matan Ruak, komprometidu atu harii futuru ida ne'ebé prósperu, iha ne'ebé Austrália sai hanesan parseiru ida ne'ebé labele substitui.

"VIII Governu Konstitusionál apresia desizaun ne'ebé fó sai horiseik Kinta 7 Fulan Jullu husi prokuradór jerál australianu, Mark Dreyfus, hodi retira (dada-hikas) akuzasaun hasoru Bernard Collaery, hafoin tinan haat nia hetan akuzasaun tanba divulga informasaun konfidensiál sira kona-ba suposta operasaun espionajen Austrália nian iha Timor-Leste," dehan komunikadu ne'ebé jornalista BT asesu husi Media Gabinete Primeiru Ministru, Sesta (08/07).

Tuir Prokuradór jerál, Mark Dreyfus QC MP, hato'o iha anúnsiu desizaun ne'e katak tau iha konsiderasaun "kompromisu atu proteze interese nasional Austrália nian, inklui seguransa nasional no relasaun Austrália ho ninia viziñu besik sira".

Governu Timor-Leste rekoñese no agradese kontribuisaun Bernard Collaery no ninia kliente, eis-espiaun ida koñesidu hanesan Testemuña ka, iha prosesu ne'ebé permite ona atu estabelese fronteira marítima definitiva sira entre Timor-Leste ho Austrália iha Tasi Timor, ne'ebé atinje ona ho asinatura tratadu entre país rua ne'e iha loron 6 fulan-Marsu tinan 2018.

Timor-Leste selebra no rekoñese mós kontribuisaun povu australianu nian ne'ebé durante ne'e apoia no kontribui ona hodi taka akuzasaun ida-ne'e no hodi alkansa akordu delimitasaun fronteira marítima ho Austrália. (BT)